



**S** Dañ die bauleüt auch maler vnd ander etwan schrift an die hohen gemeiner pflegen zu ma-  
 chen/ so thüt not das sie recht bustaben leren machen/ darumb will ich hie ein wenig dafon an-  
 zeugen/ erstlich ein Lateinisch. a b c. für schreyben/ darnach ein textur/ die zwo schrift man ge-  
 wonlich zu solchen dingen braucht.

Zu dem ersten vñ Lateinischē bustabē mach zu einē netlichen ein rechte fierung darein er verfast werd  
 aber so du den bustaben darein zeuchst so mach sein grösseren zug breyt ein zehenteyl von der fierung/  
 seyten leng/vnd den dünneren zug mach eyns dritenyls breyt von dem breyten / das merck durch all bu-  
 staben durch das ganz. a b c.

Erstlich mach das. a. also/bezeychen die eck seiner fierung mit. a. b. c. d. das thü zu allen bustaben / vñ  
 zerteyl dise fierung mit zweyen kreuz linien die aufrecht. e. f. die zwerch. g. h. Darnach sez vnden in  
 der fierung bey. c. d. zwen punctten. i. k. eyn zehen teyl hinein/ vnd zeuch den dünnen strich des bustaben  
 von dem. i. ober sich an die fierung von dan zeuch den breyten strich wider herab/ also das ire beder brey-  
 ten aussen die zwen punctten. i. k. an rüren/ so beleybt mitten ein dryangel/ aber der punct. e. kumpt oben  
 mitten in den bustaben. Darnach zeuch das. a. vnder dem zwerch strich. g. i. zusamē/ den strich mach  
 eynes dritenyls breyt von der grösseren breyten. Darnach las an dem breyten strich oben ein rund cir-  
 keldrum hinder sich ober die fierung auß streychen / vnd nym den bustaben oben mit einer schlangen-  
 liini ab/ also das die hölen gegen dem dünnen strich ste/ vnd schweyff des bustaben strich vnden auf bez-  
 den seyten auß/ also das sie der fierung eck. c. d. rüren / das thü mit einem cirkeldrum des halben Dia-  
 meter eyn sibten teyl von der fierung seyten hab / aber innen hinein las den auß drit von der grösseren  
 breyten des strichs zwey dritenyl weyt für dretten / das nym zu bedem teyl mit einem cirkeldrum auß des  
 Diameter des breyten strichs breyt sey.

Item dises. a. magst du auch oben mit der fierung blat ab nemen vnd den bustaben auf beder seyten  
 außschweyffen wie vnden / doch das der lenger teyl foren werde / aber oben müssen die strich ein wenig  
 neher zusamen geruekt werden. Diser dreyer meynung must du dich gebrauchen / welche dir am bas-  
 ten gefelt/ vnd merck zu gleycher weyß wie diser bustab. a. oben vnd vnden außgeschweyft wirdt/ also  
 solst du auch außschweyffen die bustaben der strich ortschelchs gezogen werden/ als da ist. v. x. y. aber  
 doch ein wenig geendert/ wie du hernach hören wirst. Item das. a. magst du noch anderst machen/  
 nemlich oben scharpf / so leinen sich die strich oben neher zusamen. Darnach ruck den zwerch zug ein  
 wenig mer herab/ vñ mach in noch so breyt als for/ du magst auch den strich oben stumpf abschneyden  
 oder fornē außschweyffen. Vnd diser bustab ist hernach aufgerissen.



¶